

## Scannal na nGardaí

**Ceist 1** Beidh tú ag féachaint ar ball ar thuairisc faoi scannal na nGardaí. Sula bhféachann tú ar an tuairisc áfach, an féidir leat féin agus an duine in aice leat Gaeilge a chur ar na focail seo?

|   |
|---|
| Garda Commissioner<br>whistle-blower(s)<br>behaviour<br>disgusting<br>demanding<br>referring to<br>a meeting of the Public Accounts Committee<br>Easter<br>new authority<br>extra powers<br>to oversee, to supervise<br>inquiry<br>penalty points |
|---|

**Ceist 2** Agus na focail thuas as Gaeilge agaibh anois, an féidir libh buille faoi thuairim a thabhairt faoi ábhar na míre? Féachaigí ar an tuairisc den chéad uair le feiceáil an raibh an ceart agaibh.

**Ceist 3** Cén teideal atá ag na daoine seo a leanas agus cad a bhí le rá acu faoin scéal?

| An duine        | An teideal | Cad a bhí le rá? |
|-----------------|------------|------------------|
| Enda Kenny      |            |                  |
| Martin Callinan |            |                  |
| Eamon Gilmore   |            |                  |
| Pat Rabbitte    |            |                  |
| Joe Costello    |            |                  |
| James Reilly    |            |                  |
| John Downing    |            |                  |

**Ceist 4** '...go gcuideodh sé...'

1. Cén aimsir atá i gceist leis an sampla thuas?
2. Bain úsáid as na briathra seo chun na deirí cuí a bhaineann leis an aimsir chéanna a chur in iúl:

| Cuir | Glac | Réitigh | Bunaigh |
|------|------|---------|---------|
|      |      |         |         |

3. Cum cúig abairt a bhfuil 'dá mbeadh' mar thús acu.

**Ceist 5** '...seisear airí rialtais...'

Cuir an leagan ceart den ainmfhocal atá idir lúibíní, sna spásanna tar éis na n-uimhreacha:

|                     |       |
|---------------------|-------|
| triúr (ceoltóir)    | _____ |
| sé (buidéal)(déag)  | _____ |
| beirt (bean)        | _____ |
| seachtó (ríomhaire) | _____ |
| ceithre (bliain)    | _____ |
| cúig (cóta)(déag)   | _____ |
| céad (míle)         | _____ |
| cúigiú (urlár)      | _____ |
| seisear (deirfiúr)  | _____ |
| trí (gluaisteán)    | _____ |

**Ceist 6** Pléigh na ceisteanna leis na daoine eile i do ghrúpa:

1. Cad a cheapann tú faoi rialtas na hÉireann faoi láthair?
2. Cad a cheapann tú faoi pholaiteoirí, go ginearálta?
3. Ar cheart go mbeadh gunnaí ag na Gardaí Síochána, dar leat? Cén fáth?

**Treoracha agus Freagraí**

**Ceist 1**

Garda Commissioner  
whistle-blower(s)  
behaviour  
disgusting  
demanding  
referring to  
a meeting of the Public Accounts Committee

*Coimisinéir na nGardaí*  
*sceithire/sceithirí*  
*iompar*  
*déistíneach*  
*ag éileamh*  
*ag tagairt do*  
*cruinniú an Choiste um Chuntais*  
*Phoiblí*  
*An Cháisc*  
*údarás nua*  
*cumhachtaí breise*  
*maoirseacht a dhéanamh ar*  
*fiosrúchán*  
*pointí pionóis*

Easter  
new authority  
extra powers  
to oversee, to supervise  
inquiry  
penalty points

**Ceist 2**

Iarr orthu buille faoi thuairim a thabhairt faoi ábhar na míre sula bhféachann siad uirthi.

**Ceist 3**

| <b>An duine</b> | <b>An teideal</b>                 | <b>Cad a bhí le rá?</b>   |
|-----------------|-----------------------------------|---|
| Enda Kenny      | An Taoiseach                      | Go bpléifear cás Martin Callinan ag cruinniú na comh-aireachta sa Dáil amárach.   |
| Martin Callinan | Coimisinéir na nGardaí            | Deir sé nach ag tagairt do na Gardaí féin a bhí sé, nuair a labhair sé ag cruinniú an Choiste um Chuntais Phoiblí, ach go raibh déistin air nach raibh sceithirí ag baint úsáide as an bpróiseas cuí le heolas a sceitheadh.    |
| Eamon Gilmore   | An Tánaiste                       | Go bhfuil an Lucht Oibre ag súil go dtarraingeoidh an Coimisinéir siar a ráiteas faoi iompar na nGardaí; agus go gcuideoidh sé dá dtarraingeodh Alan Shatter an méid a dúirt sé faoi Maurice McCabe siar, chomh maith.          |
| Pat Rabbitte    | An tAire Cumarsáide               | Go bhfuil an Lucht Oibre ag súil go dtarraingeoidh an Coimisinéir siar a ráiteas faoi iompar na nGardaí.  |
| Joe Costello    | Aire Stáit, Páirtí an Lucht Oibre | Go mbeadh sé níos fearr dá dtiocfadh le Martin Callinan an focal <i>déistíneach</i> a d'úsáid sé i leith na sceithirí, a tharraingt siar.   |
| James Reilly    | An tAire Sláinte                  | Nach mbeadh sé ag caint faoin scéal roimh chruinniú an rialtais.  |
| John Downing    | Iriseoir                          | Nach bhfuil deireadh leis an scéal go fóill, go bhfuil trí thuarascáil eile le teacht, agus go bhfuil caint faoi údarás nua sna Gardaí ina measc. Dá thúsce is ea is fearr an t-údarás nua sin, de réir Pháirtí an Lucht Oibre. |

**Ceist 4**

1. An Modh Coinníollach.
2. Féach:

| Cuir              | Glac             | Réitigh         | Bunaigh        |
|-------------------|------------------|-----------------|----------------|
| chuirfinn         | ghlacfainn       | réiteoinn       | bhunóinn       |
| chuirfeá          | ghlacfá          | réiteofá        | bhunófá        |
| chuirfeadh sé/sí  | ghlacfadh sé/sí  | réiteodh sé/sí  | bhunódh sé/sí  |
| chuirfimis        | ghlacfaimis      | réiteoimis      | bhunóimis      |
| chuirfeadh sibh   | ghlacfadh sibh   | réiteodh sibh   | bhunódh sibh   |
| chuirfidís        | ghlacfaidís      | réiteoidís      | bhunóidís      |
| An gcuirfeadh sé? | An nglacfadh sí? | An réiteodh sé? | An mbunódh sí? |
| Chuirfeadh        | Ghlacfadh        | Réiteodh        | Bhunódh        |
| Ní chuirfeadh     | Ní ghlacfadh     | Ní réiteodh     | Ní bhunódh sé  |

3. Bíodh abairtí ar nós na habairte seo ag na foghlaimeoirí: *Dá mbeadh an aimsir níos fearr in Éirinn ní rachainn ar laethanta saoire thar lear gach bliain.*

**Ceist 5**

triúr ceoltóirí  
sé bhuidéal déag  
beirt bhan  
seachtó ríomhaire  
ceithre bliana  
cúig chóta dhéag  
céad míle  
cúigiú hurlár  
seisear deirfiúracha  
trí ghluaisteán

**Ceist 6**

Is féidir leis na daltaí an plé seo a dhéanamh i mbeirteanna nó i ngrúpaí.

### **Eibhlín Ní Choistealbha**

Dúirt an Taoiseach, Enda Kenny, inniu go bpléifear ag cruinniú rialtais an lae amárach, ar cheart do Choimisinéir na nGardaí, Martin Callinan, a leithscéal a ghabháil faoin méid a dúirt sé faoi na sceithirí Gardaí. Dúirt an Tánaiste, Eamon Gilmore, agus an tAire Cumarsáide, Pat Rabbitte, go bhfuil Páirtí an Lucht Oibre ag súil go dtarraingeoidh an Coimisinéir siar an ráiteas a dhein<sup>1</sup> sé faoi iompar na nGardaí a bheith déisteach.

### **Irene Ní Nualláin**

Tá seisear airí rialtais anois ag éileamh ar Choimisinéir na nGardaí, Martin Callinan, an méid a dúirt sé faoin mbeirt sceithirí Gardaí a tharraingt siar. I ráiteas ón gCoimisinéir, deir sé nach ag tagairt do na Gardaí féin a bhí sé, nuair a labhair sé ag cruinniú (an) Choiste um Chuntais Phoiblí, ach go raibh déistin air nach raibh sceithirí<sup>2</sup> ag baint úsáide as an bpróiseas cuí le heolas a sceitheadh.

### **Joe Costello, TD, Aire Stáit, Páirtí an Lucht Oibre**

Bheadh sé i bhfad níos fearr dá mbeadh sé in ann an focal sin a d'úsáid sé, a d'úsáid<sup>3</sup> Martin Callinan, Coimisinéir na nGardaí, is é sin an focal *disgusting*, i dtaobh na sceithirí Gardaí, é a tharraingt siar. Agus é a dhéanamh anois.

### **James Reilly, TD, An tAire Sláinte**

Dúirt mé cheana féin go mbeidh mé ag caint mar gheall air seo amárach ag cruinniú na comh-aireachta<sup>4</sup>. Aon rud atá le rá agam, beidh mé a rá ansin.

### **John Downing, Irish Independent**

Leanfaidh an drochscéal ar aghaidh mar tá trí thuarascáil<sup>5</sup> eile le teacht, péire acu thart ar an Cháisc. Is chuige sin go bhfuil caint faoi údarás nua le cumhachtaí breise chun maoirseacht a dhéanamh ar an Gharda Síochána, agus tá an Lucht Oibre ag éileamh go ndéanfar é sin níos luaithe...chomh luath agus is féidir.

### **Irene Ní Nualláin**

Dúirt an Tánaiste, Eamon Gilmore, go gcuideodh sé le cúrsaí dá mbeadh an tAire Dlí agus Cirt, Alan Shatter, sásta an méid a bhí le rá aige siúd faoi Sháirsint Maurice McCabe a tharraingt siar. Is é sin, nach raibh an Sáirsint McCabe sásta comhoibriú le fiosrúchán na nGardaí faoi na pointí pionóis. Pléifear an scéal ag cruinniú rialtais amárach. Irene Ní Nualláin, Nuacht TG4.

---

<sup>1</sup> a rinne sé atá sa Chaighdeán Oifigiúil

<sup>2</sup> sceitheadóirí a deirtear - an leagan malartach den fhocal *sceithirí*

<sup>3</sup> a úsáid a deirtear

<sup>4</sup> comh-aireachas a deirtear

<sup>5</sup> tuarascáil a deirtear